

Headlines

- मुख्मन्त्री ओमर अब्दुल्ला होरें सार्वजनिक सेवाएं च ईमानदारी ते पारदर्शिता लेई अपनी सरकार दी बचनबद्धता गी पक्का करदे होई अधिकारिणं गी ईमानदारी कन्नै कम्म करने दी सगंध चुकाई।
- युवा आपदा मित्तर योजना दे तैह्त् 2 लक्ख शा मते स्वयंसेविणं गी सिखलाई दिती जाग।
- प्रधानमन्त्री नरेंद्र मोदी होर बक्ख-बक्ख सरकारी मैहकमें च नमें नियुक्त नौजवानें गी कल वीडियो कांफ्रेंस दे राहें 51 ज्हार शा मते नियुक्ति पत्तर बंडुडन।
- प्रधानमन्त्री नरेंद्र मोदी ते स्पेन दे प्रधानमन्त्री होरें गुजरात दे बडोदरा च सी-295 फौजी जहाज बनाने सरबंधी सुविधा दा अज्ज सांझे तौर पर उद्घाटन कीता।

<><><><><><>

CM-Pledge

सतर्कता जागरूकता हफ्ते दे शुरू होने दे मौके पर मुख्मन्त्री ओमर अब्दुल्ला होरें अज्ज सरबंधत अधिकारिणं गी ईमानदारी दी सगंध चुकाई। श्रीनगर आह्ले सिविल सैक्रेटेरिएट च अज्ज दिनै 11 बजे लोआए गेदे इस कार्यक्रम च प्रशासनिक सचिवें ते बक्ख-बक्ख मैहकमें दे प्रमुखें हिस्सा लैत्ता। जम्मू च मजूद ऐह्लकारें जम्मू सैक्रेटेरिएट थमां जिसले के डिविजनल कमिशनरें, डिप्टी कमिशनरें ते होरनें अफसरें अपने जिला हैडक्वार्टरें थमां इस कार्यक्रम च वीडियो कांफ्रेंस राहें हिस्सा लैत्ता। इनें मैहकमें च बी मगरा मुलाजमें गी ईमानदारी दी सगंध चुकाई गेई। अपने संबोधन च मुख्मन्त्री ओमर अब्दुल्ला होरें आखेआ जे 28 अक्तूबर थमां 3 नवंबर तगर मनाए जा करदे सतर्कता जागरूकता हफ्ते दरान ओहू इस गल्लै गी फही पक्का करदे न जे जम्मू-कश्मीर गी भ्रष्टाचार थमां पूरी चाल्ली मुक्त बनाया जाग। उनें आखेआ जे एहू इक मिशन ऐ जेह्डा सरकार गी दलेरी कन्नै सुधार आहनने ते नागरिकें गी सशक्त बनाने लेई प्रेरित करदा ऐ। मुख्मन्त्री होरें सब्बनें मंत्रिणं, प्रशासनिक सचिवें, मैहकमें दे प्रमुखें ते होरनें अफसरें गी सलाहू

दिती जे ओहू अपने कम्मं दे राहें, पारदर्शिता ते जोआबदेही दी इक नमीं संस्कृति गी विकसित करना।



LG-Pledge

सतर्कता जागरूकता हफ्ते दे मौके पर अज्ज राजभवन श्रीनगर च अफसरें गी ईमानदारी कन्नै कम्म करने दी सगंध चुकाई गई। लेफ्टिनेंट गवर्नर मनोज सिन्हा होरें अफसरें गी एहू सगंध चुकाई। अपने संदेश च एल.जी होरें आखेआ जे पूरे-पराते विकास दी बत्ता च भ्रष्टाचार इक बड्डी रूकावट हुंदा ऐ कीजे एहू जरूरी सेवाएं ते आर्थिक विकास थमां संसाधनें गी दूर करी दिंदा ऐ। उनें आखेआ जे सतर्कता बक्ख-बक्ख संगठनें, इदारें ते समाज दे बवस्थित ते पारदर्शी कम्मकाज च महत्वपूर्ण भूमिका निभाई सकदी ऐ। उनें आखेआ जे सौहार्द-सतर्क रेह्यि अस इक ऐसी बवस्था दे निर्माण च योगदान देई सकने आं जेह्डी समाज च नेकी, न्याऽ ते तरक्की गी बढ़ावा दिंदी ऐ। एल.जी होरें इब्बी आखेआ जे सब्बनें सरबंधत धड़ें बश्कार सतर्कता जागरूकता जोआबदेही दी संस्कृति विकसित करने दे कन्नोकन्नी सार्वजनिक हितें दी राक्खी बी करदी ऐ।



Vigilance-Awareness Week

मुख्य भरै च अज्जै थमां सतर्कता जागरूकता सप्ताह मनाया जा'रदा ऐ। इस हफ्ते दा विशेषार ऐ- 'राश्ट्र दी खुशहाली लेई अखंडता दी संस्कृति'। आकाशवाणी दे संवाददाता दी रिपोर्ट मुजब इस हफ्ते दरान बक्ख-बक्ख मंत्रालयें, मैहकमें, सार्वजनिक खेत्तर दे उपक्रमें, बैंकें ते होरनें संगठनें च सरकारी मुलाजमें गी ईमानदारी दी सगंध चुकाई जाग। इस हफ्ते दरान भ्रष्टाचार दे खलाफ जागरूकता लेई केई समारोह आयोजित कीते जाडन। केंद्री सतर्कता आयोग च आयुक्त प्रवीण कुमार श्रीवास्तव होरें अफसरें ते अधिकारिए गी सगंध चुकाई। तोआई आकाशवाणी दिगं डरैक्टर जनरल डॉक्टर प्रज्ञा पालिवाल गौर होरें नमीं दिल्ली च आकाशवाणी भवन च सतर्कता जागरूकता हफ्ते दे सिलसिले च मलाजमें गी ईमानदारी कन्नै कम्म करने दी सगंध चुकाई।



DC-Vigilance Week

जम्मू दे डिप्टी कश्मिनर सचिन कुमार वैश्य होरें सतर्कता जागरूकता हफ्ते दे सरबंधै च अज्ज सरबंधत अफसरें गी ईमानदारी दी सगंध चुकाई। इस मौके उनें बक्ख-बक्ख मैहकमें दे अफसरें गी आखेआ जे ओहू सार्वजनिक सेवाएं दी दस्तयाबी च ईमानदारी, अखंडता ते पारदर्शिता दे उच्चे मानक स्थापित करन।



GDC-Kishtwar

28 अक्तूबर थमां त्रै नवंबर तगर चलने आहले सतर्कता जागरूकता सप्ताह 2024 गी अधिकारिक तौरा पर किशतवाड़ दे सरकारी डिग्री कॉलेज च शुरू कीता गेआ ऐ। इस बरे दा विशेसार ऐ “Culture of Integrity for Nation’s Prosperity” यानि राष्ट्र दी समृद्धि लेई इकजुटता दी संस्कृति। इस दौरान स्हाड़े राष्ट्र दे खुशहाल भविक्ख तैयार करने च पारदर्शिता ते नैतिक मुल्य-कदरें दे महत्व पर जोर दितता गेआ ऐ। हस हफ्ते दी शुरूआत किशतवाड़ सरकारी डिग्री कॉलेज दे प्रिंसीपल बशरत इकबाल हुंदे आसेआ इकजुटता सगंध समारोह कन्नै होई। स्हाड़े जिला संवाददाता कैलाश नाथ होरें अपनी रिपोर्ट च दस्सेआ जे इस समारोह च तकरीबनद 300 जने शामिल होए जिंदे च विद्यार्थी, स्टाफ सदस्य शामिल न जिनें निजी ते पेशेवर जीवन च ईमानदारी ते जवाबदेही गी बनाई रखने लेई बचनबद्धता दस्सेआ।



Reasi-Pledge

भ्रष्टाचार दी कबैतू गी खत्म करने लेई ‘सतर्कता जागरूकता हफ्ते’ दे मौके पर रियासी जिले दे सब्बै पुलसै दफतरै च इक सगंध समारोह आयोजित कीता गेआ। रियासी दे एसएसपी गौरव सिकरवार हुंदे दिशा-निर्देश पर डीपीओ रियासी च मुख्ख सगंध समारोह दा आयोजन कीता गेआ। जिला रियासी दे एसएसपी प्रशासन नै जोआनें गी भ्रष्टाचार गी रलियै खत्म कनरने ते भ्रष्टाचार दे सब्बनें स्वरूपै खलाफ कार्रवाई दी सगंध चकाई। अधिकारिएं ते जोआनें सम्प्रभुता, पारदर्शिता ते खरे प्रशासन दे उच्चे म्यार गी बनाई रखने लेई पूरे जज्बे कन्नै कम्म करने, रिश्वते

दी पेशकश नेई करने ते गुज लैने थमां बचने ते ईमानदारी दी संस्कृति गी बढावा देने दी सगंध लैती।



DC-Reasi Ekta Diwas

रियासी दे डिप्टी कमिशनर विशेष महाजन होरें राश्ट्री एकता दिवस ते एकता द्रौड़ लेई तैयारिएं पर चर्चा गितै अज्ज इक बैठक सद्दी। कल 29 अक्तूबर गी आयोजित होन जा'रदे इस कार्यक्रम गी कामयाब बनाने सरबंधी बक्ख-बक्ख पैहलुएं पर इस मौके चर्चा कीती गई। स्हाड़े जिला संवाददाता देवेन्द्र ठाकुर दी रिपोर्ट मुजब डिप्टी कमिशनर होरें एकता द्रौड़ दे कन्नै एकता दी सगंध चुकाए जाने दे बी निर्देश दित्ते ना। कार्यक्रम दे नोडल अफसर सचिन शर्मा होरें इनें समारोहें च विद्यार्थिएं दी शमूलियत दे महत्व पर बल दित्ता ऐ।



Yuva Aapda Mitra Scheme

युवा आपदा मित्र योजना दे तैहत नेशनल कैडर कौर दे नेहरू युवा केंद्र संगठन नेशनल सर्विस स्कीम ते भारत स्काउट ते गाईड्स दे 2 लक्ख 37 ज्हार थमां मते स्वयंसेविएं गी प्रशिक्षत कीता जाग। केंद्री गृह सचिव गोविंद मोहन होरें अज्ज राश्ट्रीय आपदा प्रबंधन प्राधिकरण दे 20में स्थापना दिवस समारोह दौरान नमीं दिल्ली च इक योजना दा शुभारम्भ कीता। इस योजना दा मकसद आपदाएं दी तैयारी ते प्रतिक्रिया लेई समुदाय दे स्वयंसेवकें गी सिखलाई देना ऐ। इस मौके पर बोलदे होई श्री मोहन होरें आखेआ जे युवा आपदा मित्र योजना तैहत घट्टोघट्ट 50 फीसद महिलाएं गी प्रशिक्षत करने दा लक्ष्य रक्खेआ गेदा ऐ। उनें आखेआ जे औने आहले समें च एहू युवा आपदा मित्र समाज दे पैहली पंक्ति रक्षक बनने लेई तैयार होडन। इस बरे जुलाई म्हीने केंद्री गृहमंत्री अमित शाह होरें एनडीआरएफ थमां 470 करोड़ रुपें शा मते खर्चे आहले युवा आपदा मित्र योजना दे प्रस्ताव गी मंजूरी देई दित्ती ही जेहडी देश दे 315 आपदा दी शैका आहले जिले च लागू कीता जाग।



PM-Rozgar

प्रधानमंत्री नरेंद्र मोदी होर बक्ख-बक्ख सरकारी मैहकमें च नमें भर्ती नौजवानें गी कल वीडियो कांफ्रेंस दे राहें नियुक्ति पत्तर भेंट करडन। इस रोजगार मेले दा आयोजन मुल्ख भरै च 40 थाहें पर कीता जाहगा। एह रोजगार मेला रोजगार पैदा करने दी प्रधानता हुंदी वचनबद्धता गी दर्शादा ऐ। नमें भर्ती नौजवानें गी । Got कर्मयोगी पोर्टल दे राहें बुनियादी सिखलाई हासल करने दा मौका बी थ्होग। इस मंच पर 1400 शा मते ई-लर्निंग कोर्स उपलब्ध न जिंदे राहें एह नौजवान मते सक्षम बनी सकडन।



PM Spanish

प्रधानमंत्री नरेन्द्र मोदी ते स्पेन दे प्रधानमंत्री पेद्रो सांचेज होरें अज्ज गुजरात दे वडोदरा च सी-295 फौजी ज्हाजें दे निर्माण लेई टाटा एयरक्राफ्ट कॉम्पलेक्स दा सांझे तौर पर उद्घाटन कीता। एह भारत च फौजी ज्हाजें दे निर्माण लेई निजी खेत्तर दी पैहली फाइनल असेम्बली लाईन ऐ। इस मौके पर प्रधानमंत्री नरेन्द्र मोदी होरें आखेआ जे टाटा एयरक्राफ्ट कॉम्पलेक्स आलमी सतह उप्पर ज्हाजें दे निर्माण च इक भरोसेमंद सांझेदार दे रूप च भारत दी स्थिति गी मजबूत बनांदा ऐ। उनें आखेआ जे एह फैक्ट्री नां छडे भारत ते स्पेन दे सरबंधें गी सशक्त बनाग सगुआं मेक इन इंडिया ते मेक फॉर द वर्ल्ड मिशन गी बी बल देग। प्रधानमंत्री होरें आखेआ जे ओहू दिन दूर नेई जदूं भारत दुनिया लेई यात्री ज्हाज तैयार करोग ते भारत दे भलेआं लौहके, लौहके ते दरम्याने दर्जे दे उद्यमें आहले खेत्तर दी एहदे च इक बड्डी भूमिका होग। प्रधानमंत्री होरें भारत दे रक्षा खेत्तर दे ऐतिहासिक विकास दा जिक्र बी कीता। उनें आखेआ जे देशै च जीवंत रक्षा उद्योग तैयार करने दे प्रति उंदी सरकार केई गैहीं पुट्टा करदी ऐ ते रक्षा निर्माण दे खेत्तर च निजी सैक्टर दी भागीदारी गी बी बढावा देआ करदी ऐ। पिच्छले 5एं ब'रें दरान देशै च तकरीबन इक ज्हार रक्षा स्टार्टअप्स स्थापित कीते गे न ते पिच्छले 10एं ब'रें दरान भारत दे रक्षा निर्यातें च 30 गुना बाद्दा होआ ऐ। भारत हून दुनिया दे 100 शा मते मुल्खें गी रक्षा

उपकरणों दा निर्यात करै करदा ऐ। खाने-पीने आह्लिएं चीजें, फिल्में ते फुटबॉल दे राहें भारत ते स्पेन दे लोकें बशकार आपसी सरबंधें गी लेइयै श्री मोदी होरें आखेआ जे दौनें मुल्खें ब'रे 2026 गी संस्कृति, पर्यटन ते आर्टिफिशिएल इंटेलिजेस दे ब'रे दे तौर पर मनाने दा फैसला कीता ऐ। इस मौके पर स्पेन दे प्रधानमंत्री पेद्रो सांचेज होरें आखेआ जे एयरबस ते टाटा दे बशकार दी एह सांझ-भ्याली ज्हाजें सरबंधी भारती उद्योग दी तरक्की च योगदान देग। एह सांझेदारी यूरोप दिएं होरनें कंपनीं लेई बी नमें मौके उपलब्ध करोआग। टाटा दे अलावा भारत इलेक्ट्रॉनिक्स लिमिटेड ते भारत डायनेमिक्स लिमिटेड ते निजी खेत्तर दे एम.एस.एम.ई. इस कार्यक्रम च जोगदान देडन। कुल 56 ज्हाजें चा 40 सी-295 फौजी ज्हाजें दा निर्माण वडोदरा च टाटा एडवांस्ड सिस्टम्स लिमिटेड आसेआ जदके 16 ज्हाजें दी सुपुर्दगी स्पेन दी ज्हाज बनाने आहली कंपनी एयरबस करोग। दौनें नेताएं वडोदरा दे मशहूर लक्ष्मी विलास पैलेस दा दौरा लाया ते डेलीगेशन स्तरै दी गल्लबात बी कीती।

<><><><><><>

Search-Operation

जम्मू दे अखनूर सैक्टर दे इक ग्रां च फौज दे काफिले पर अज्ज इक होआ ऐ एह हमला करने आहले हाल च गै घुसपैठ करियै अपाए दे हे ते उंदे समूह गी नकारा करने लेई स्पेशल फोर्स गी लाया गेदा ऐ। टाकरे मगरा हथियारें दे कन्नोकन्नी इक आतंकवादी दी लोथ बी बरामद कीती गेई ऐ। कार्रवाई कन्नै जुडे दे अभियान बारै ताजा जानकारी दिंदे होई सेना दी जम्मू व्हाईट नाइट कौर नै दस्सेआ जे अभियान अजें जारी ऐ। एह कार्रवाई उसलै सामने आई जिसलै बडुलै स्हाडे 6 बजे दे करीब आतंकवादिएं जिंदी गिनतरी त्रै होने दी संभावना ऐ, नै इक-इक सेना दी एम्बुलेंस गी नशाना बनाया। एहदे मगरा एह आतंकवादी जंगल बक्खी नस्सने च कामयाब होई गे जेडे हाल च गै घुसपैठ करियै इत्त भेठ आए दे। सेना दे विशेष बलें ते एनएसजी गी कार्रवाई च लाया गेआ जेदे चलदे दपैहरी पौने त्रै बजे दे कोलकश जबरदस्त गोलीबारी ते धमाके होए। आतंकवादिएं दी दरपकड़ लेई हेलीकाप्टर बी डुआरी राएं निगरानी करा'रदा ऐ। खोड दे भट्टल इलाके च एह कार्रवाई उसलै शुरू होई जिसलै मंदर दे कोल मुख सड़क पर सेना दी एम्बुलेंस पर आतंकवादी हमला कीता।